



We will be conducting system maintenance from Thursday 9 February 2023, 11pm to Friday 10 February 2023, 12am. Patrons may experience intermittent connectivity to NLB websites during this period. Thank you for your understanding.

## Kejayaan semarak langkah pesilat

BERITA HARIAN, 26 May 2005, Page 18

Article also available on Microfilm Reel NL26198

Printer-Friendly Page

### Kejayaan semarak langkah pesilat

**KEJAYAAN** menggondol anugerah Olahragawan dan Olahragawati Remaja hanya akan menyemarakkan lagi usaha Persekutuan Pencak Silat Singapura (Persisi) untuk bergerak ke mercu prestasi yang lebih tinggi pada masa akan datang.

Ini merupakan hasrat pengarah teknikal Persisi, Sheik Alauddin Yaacob, menyusuli pemilihan Mohd Saifuddin Julaimi dan Saiedah Said sebagai Olahragawan Remaja dan Olahragawati Remaja di majlis penyampaian Anugerah Sukan di Hotel Orchard malam tadi.

Menurut Sheik Alauddin, inilah kali pertama Persisi menerima pengiktirafan berganda selain daripada 19 lagi ahli silatnya yang menerima Anugerah Penghargaan daripada Majlis Olimpik Kebangsaan Singapura (SNOC).

"Ia adalah kejayaan membanggakan dan kami perlu melihat ia sebagai pendorong untuk kami bekerja lebih keras pada masa akan datang," jelas Sheik Alauddin.

Bagi Saifuddin dan Saiedah, kejayaan itu akan mendorong mereka untuk berusaha lebih gigih bagi menghadapi cabaran dalam Sukan SEA yang akan berlangsung di Manila November ini.

"Ini merupakan penampilan saya yang pertama dalam Sukan SEA jika dipilih dan ia cukup besar ertinya bagi saya," kata Saifuddin, 18 tahun, yang memenangi pingat perak di Kejohanan Silat Dunia tahun lalu.

Saiedah, 20 tahun, berkata persaingan merebut pingat di Sukan SEA lebih meninggalkan kesan berbanding Kejohanan Dunia.

"Lebih ramai yang mengikuti perkembangan Sukan SEA, tidak seperti Kejohanan Dunia, hanya masyarakat silat sahaja yang mengetahui mengenainya," jelas Saiedah.

Juara Kejohanan Perancis, Belgium dan Kejohanan Dunia tahun lalu, Saiedah juga sedar kejayaannya itu akan menyemarakkan lagi usahanya untuk membuktikan beliau adalah antara yang terbaik.